

Rabu, Ogs 07 2019



Datuk Ir Amiruddin Hamzah - Foto BERNAMA

KUALA LUMPUR, 1 OGOS -Sejumlah RM6.2 bilion yang ditawarkan kerajaan bagi mengambil alih empat konsesi lebuhraya bertol di Lembah Klang bukan nilai yang muktamad, kata Timbalan Menteri Kewangan Datuk Ir Amiruddin Hamzah.

Beliau berkata, kerajaan akan melaksanakan proses sewajarnya sebelum memuktamadkan nilai yang sebenar.

"Jika proses wajar itu mendapati nilai itu terlalu rendah atau terlalu tinggi...sesuatu perlu dilakukan. Nilai tersebut bukan muktamad," katanya kepada media selepas perasmian Islamic Finance Innofest 2019, anjuran Universiti Kewangan Islam Global (INCEIF) di sini, hari ini.

Pada majlis itu Amiruddin turut melancarkan laporan bertajuk "Harnessing Value- based Intermediation: The Role of Development Financial Institutions".

Beliau menegaskan, keutamaan kerajaan Pakatan Harapan adalah memastikan hasrat dalam manifesto untuk mengurangkan dan seterusnya menghapuskan tol terlaksana.

"Pada asasnya, kita harap ia akan memberikan kesan positif kepada pengguna jalan raya dan tidak menambah beban kewangan kepada kerajaan," katanya.

Pada Jun tahun ini, Kementerian Kewangan telah mengemukakan tawaran rasmi untuk mengambil alih empat lebuhraya bertol di Lembah Klang, iaitu Lebuhraya Damansara Puchong (LDP), Sistem Penyuraian

Trafik KL Barat (SPRINT), Lebuhraya Shah Alam (KESAS) dan Terowong SMART.

Tawaran pengambilalihan itu dibuat kepada Gamuda Bhd, selaku syarikat pemegang konsesi keempat-empat lebuhraya berkenaan.

Semalam dilaporkan bahawa pengambilalihan yang dicadangkan oleh kerajaan telah ditunda bagi semakan harga.- Bernama